

Bosna i Hercegovina
FEDERACIJA BOSNE I HERCEGOVINE
UNSKO S. KANTON
KANTONALNI SUD U BIHAĆU
Broj 01 0 K 005038 10 K
Bihać, 22.11.2010.godine

Pravosnažno 20.12.2010. godine.
Presuda na osnovu sporazuma o priznanju krivnje.

U IME FEDERACIJE BOSNE I HERCEGOVINE!

Kantonalni sud u Bihaću, u vijeću sastavljenom od sudije Nizane Sarač, kao predsjednika vijeća, te sudija ovog suda Vesne Terzić i Ernese Hergić kao članova vijeća, uz sudjelovanje zapisničara Fadile Šušnjar, postupajući u krivičnom predmetu protiv optuženog Petra Arsenića sin M. iz B. L., zbog kaznenog djela- ratni zločin protiv civilnog stanovništva iz čl. 142. st. 1. u vezi sa čl. 22. preuzetog KZ SFRJ, kojeg brani branitelj po službenoj dužnosti Draško Zec, advokat iz Prijedora, odlučujući povodom optužnice Kantonalnog tužiteljstva Bihać br. Kt-144/97-RZ od 27.05.2010. godine, nakon održanog javnog ročišta za razmatranje sporazuma o priznanju krivnje od 22.11.2010. godine, te ročišta o izricanju kazneno pravne sankcije, u prisutnosti optuženog osobno i njegovog branitelja, zastupnika optužnice Kantonalnog tužitelja USK-a Jasmina Mesića, istog dana je donio i javno objavio slijedeću

P R E S U D U

Optuženi PETAR ARSENIĆ, sin M. i majke P. rođene M., rođen 09.08.1961. godine u K., općina S. M., stalno nastanjen u ..., JMB ..., pismen, sa završenom SSS, po zanimanju elektro-tehničar, oženjen, otac troje mladb. djece, vojsku služio, vodi se u vojnoj evidenciji pri OMO B. L., bez čina, lošeg imovnog stanja, po narodnosti ..., državljanin ..., do sada neosuđivan, trenutno se nalazi u pritvoru u KPZ Poluotvorenog tipa Bihać, po rješenju Kantonalnog suda u Bihaću br. 01 0 K 003655 10 Kpp od 06.05.2010. godine u trajanju od mjesec dana, pritvor po tom rješenju počinje teći od 05.05.2010. godine od 08,00 sati, te se isti produžava rješenjem ovog suda br. 01 0 K 005038 10 K od 22.11.2010. godine i isti počinje teći od 22.11.2010. godine od 11,40 sati s tim da može trajati do pravomoćnosti presude a najduže 9 (devet) mjeseci od izricanja presude, izuzetno iz važnih razloga u složenim predmetima, a odlukom vijeća se može produžiti još najduže 6 (šest) mjeseci.

K R I V J E:

Što je:

Zajedno sa prvooptuženim Ristić Lazarom i trećeoptuženim Dević Predragom dana 10.10.1995. godine u popodnevnom satima u mjestu K., zaseok M.- D., općina S. M., po prethodnom dogovoru naoružan automatskim oružjem, na lokalnom putu koji vodi za S. M., zaustavio troje zaprežnih kola na kojima su bili petorica vojnika Vojske RS-a i 15 civila bošnjačke narodnosti iz sela V. i L. općina S. M., koji su se vraćali iz šume iznad mjesta K. sa radne obaveze sječe drva za potrebe Vojske RS-a i to: S. J. rođen godine, S. S. rođen godine, B. Đ. rođen godine, B. S. rođen godine, B. M. rođen godine, B. H. rođen godine, B. N. rođen godine, V. H. rođen godine, V. S.

rođen godine, K. M. rođen godine, K. S. rođen godine, B. E. rođen godine, S. F. rođen godine, G. S. rođen godine i Z. M. rođen godine, kojom prilikom je prvooptuženi Ristić Lazar automatskom puškom M-72 – B 1 (automatska puška sa drvenim kundakom i nožicama cal. 7,62 mm), psujući, naredio vojnicima i civilima da siđu sa konjskih zaprega, dok su drugo i treće optuženi Arsenić Petar i Dević Predrag automatskim puškama sa preklopnim kundakom M-70-AB 2, cal. 7,62 mm stajali pored prvooptuženog sa uprtim oružjem u pravcu navedenih zaprega i ljudi, a kada su se vojnici, koji su bili zaduženi za čuvanje naprijed navedenih civila iz radne obaveze, usprotivili postupanju optuženog, prvooptuženi Ristić Lazar, psujući tursku majku i govoreći „Vi vozite ovdje Turke, a meni je dijete poginulo, sad ćemo ostati bez svega, jer pada S. M.“ , skupa sa drugo i treće optuženim na silu uz prijetnju automatskim oružjem preuzeli civile i iste povelili nazad putem sa kojim su prethodno civili i došli u pravcu raskrsnice u zaseoku M. – D., pa kada su došli do raskrsnice, naprijed navedene civile su pod prijetnjom oružja skrenuli na jednu njivu, te ih natjerali da jedno do drugog legnu licem okrenuti prema zemlji, da bi potom u namjeri da ih liše života, a prethodno znajući da su isti Bošnjačke narodnosti, iz automatskog oružja u iste ispucali više rafala, kojom prilikom je S. J. zadobio prostrelnu ranu glave sa prostrelom mozga, S. S. zadobio strelnu ranu glave sa oštećenjem mozga, V. Đ. zadobio strelnu ranu glave i tijela sa oštećenjem unutarnjih organa, B. S. zadobio strelnu ranu glave i grudnog koša sa oštećenjem unutarnjih organa, B. M. zadobio prostrelnu ranu grudnog koša sa vanjskim i unutarnjim iskrvarenjem, B. H. zadobio prostrelnu ranu glave sa oštećenjem mozga i prelomom kostiju, B. N. zadobio prostrelnu ranu glave lijevo sa prostrelom mozga i prelomom kostiju, V. H. zadobio strelnu ranu glave sa oštećenjem mozga, V. S. zadobio strelnu ranu glave sa oštećenjem mozga, K. M. zadobio prostrelnu ranu grudnog koša sa unutarnjim i vanjskim iskrvarenjem, K. S. zadobio strelnu ranu čela sa oštećenjem mozga, B. E. zadobio prostrelnu ranu grudnog koša sa oštećenjem unutarnjih organa, S. F. zadobio ustrelno – prostrelne rane grudnog koša sa unutarnjim i vanjskim iskrvarenjem, G. S. zadobio prostrelnu ranu glave sa prostrelom mozga i Z. M. zadobio prostrelnu ranu grudnog koša sa unutarnjim i vanjskim iskrvarenjem, od kojih povreda su sva navedana lica preminula na licu mjesta.

Dakle, kršeći pravila Međunarodnog prava za vrijeme rata u Bosni i Hercegovini, izvršio ubojstvo 15 civila.

Čime je počinio kazneno djelo – ratni zločin protiv civilnog stanovništva iz čl. 142. st. 1. u vezi sa čl. 22 preuzetog KZ SFRJ, pa se primjenom navedenih zakonskih propisa, uz primjenu odredaba iz čl. 38. i 41. istog Zakona isti :

O S U Đ U J E

NA KAZNU ZATVORA U TRAJANJU OD 10 (DESET) GODINA

Na temelju čl. 57. st. 1. KZ F BiH, optuženom se u izrečenu kaznu zatvora uračunava vrijeme provedeno u pritvoru počev od 05.05.2010. godine od 08,00 sati do 22.11.2010. godine u 11,40 sati.

Na temelju čl. 202. st. 4. ZKP-a F BiH, optuženi se oslobađa od plaćanja troškova kaznenog postupka i paušala, te isti padaju na teret budžetskih sredstava suda.

Na temelju odredaba iz čl. 152. noveliranog ZKP-a F BiH („Sl. novine F BiH“ br. 12/20), optuženom se produžava pritvor i to od 22.11.2010. godine pa nadalje, te isti može trajati najduže 9 (devet) mjeseci, po ovom rješenju izuzetno iz važnih razloga u složenim predmetima, a odlukom vijeća se može produžiti još najduže 6 (šest) mjeseci.

O B R A Z L O Ž E N J E

Optužnicom Kantonalnog tužiteljstva USK-a Bihać br. Kt-144/97-RZ od 27.05.2010. godine, optuženi su Ristić Lazar sin D. iz B. L., Arsenić Petar sin M. iz B. L. i Dević Predrag sin M. iz K., općina S. M., zbog kaznenog djela- ratni zločin protiv civilnog stanovništva iz čl. 142. st. 1. u vezi sa čl. 22. preuzetog KZ SFRJ, počinjenog u vrijeme i na način поближе opisan u dispozitivu te optužnice.

Ova optužnica Kantonalnog tužiteljstva je potvrđena dana 28.05.2010.godine, rješenjem sudije za prethodno saslušanje.

Rješenjem ovog suda br. 01 0 K 003655 10 K od 19.11.2010. godine, razdvojen je kazneni postupak optuženog Arsenić Petra sin M. iz B. L., u odnosu na ostale optužene, te je tim rješenjem odlučeno da se kazneni postupak protiv optuženog posebno dovrši razmatranjem zaključenog sporazuma o priznanju krivnje, kojeg je isti zaključio dana 19.11.2010. godine sa Kantonalnim tužiteljstvom USK-a Bihać pod br. Kt-144/97-RZ, a koji je dostavljen ovom sudu istog dana.

Nakon dostavljanja zaključenog sporazuma o priznanju krivnje, ovaj sud je dana 22.11.2010. godine, zakazao i održao ročište za razmatranje zaključenog sporazuma o priznanju krivnje radi njegovog prihvatanja ili odbacivanja, a u smislu odredbe iz čl. 246. st. 3. do 6. ZKP-a F BiH.

Na održanom ročištu, vijeće ovog suda je razmatralo zaključeni sporazum o priznanju krivnje u prisutnosti optuženog i njegovog branitelja po službenoj dužnosti, u prisutnosti zastupnika optužnice Kantonalnog tužitelja Jasmina Mesića, te je na ovom ročištu vijeće izvršilo uvid u zapisnik o ispitivanju osumnjičenog od 05.05.2010. godine, zapisnik o saslušanju svjedoka M. D. od 07.04.2010. godine, zapisnik o saslušanju svjedoka G. M. od 22.03.2010. godine, zapisnik o saslušanju svjedoka V. Ž. od 02.04.2010. godine, zapisnik o saslušanju svjedoka K. B. od 15.04.2010. godine, zapisnik o saslušanju svjedoka Š. D. od 13.04.2010. godine, kao i zapisnik od istog svjedoka sačinjen dana 23.03.2007. godine, zapisnik o saslušanju svjedoka M. M. od 19.04.2010. godine, zapisnik o saslušanju svjedoka B. Dž. 15.04.2010. godine, zapisnik o saslušanju svjedoka A. Z. od 20.04.2010. godine, zapisnik o saslušanju svjedoka B. Š. od 14.04.2010.godine, zapisnik o saslušanju svjedoka U. M. od 20.05.2010. godine, zapisnik o saslušanju svjedoka I. Ž. od 24.05.2010.godine zapisnik o saslušanju svjedoka M. D. od 17.05.2010.godine, zapisnik o saslušanju svjedoka Š. R. od 20.05.2010.godine, zapisnik o saslušanju svjedoka V. M. od 20.05.2010.godine, zapisnik o saslušanju svjedoka C. B. od 20.05.2010. godine, zapisnik o saslušanju svjedoka B. T. od 20.04.2010. godine, zapisnik o saslušanju svjedoka B. A. od 09.04.2010. godine, zapisnik o saslušanju

svjedoka K. S. od 22.04.2010. godine, zapisnik o saslušanju svjedoka B. M. od 15.04.2010. godine, zapisnici o saslušanju svjedoka dati pred istražnim sudijom od 12.05.1998. godine i to V. S., B. A. od 12.05.1998. godine B. S. od 11.05.1998. godine, B. B. od 12.05.1998. godine (oštećeni), G. M. od 11.05.1998. godine, S. M. od 21.04.2010. godine, V. D. od 09.04.2010. godine, Z. S. od 20.04.2010. godine, B. Z. od 20.04.2010. godine, K. M. od 21.04.2010. godine, S. A. od 22.04.2010. godine, akt tužiteljstva BiH br. Kta-RZ-332/05 od 05.07.2005. godine, obavijest o nadležnosti Kantonalnog tužiteljstva za procesuiranje ratnog zločina, zapisnik o uviđaju Višeg suda u Bihaću vezano za pronalaska tijela ubijenih u oktobru 1995. godine službenu zabilješku 3 PU S. M. od 24.03.2010. godine, u prilogu sa CD-om, rješenje Kantonalnog suda u Bihaću br. KRI-41/92, 43, 44, 45, 46/97 od 29.05.1997. godine o naređenoj ekshumaciji, zapisnik o uviđaju ekshumacije masovne grobnice K. na općini S. M. br. KR-42/97 od 29.05.1997. godine, zapisnik o izvršenoj identifikaciji tijela iz masovne grobnice G. - K., općina S. M. br. KRI-42/97 od 13.06.1997. godine obdukcione zapisnike od 1-15, sačinjene po prim. dr. Mešić-Pašalić Semiri, te u zapisnike o identifikaciji po istom liječniku, u službenu zabilješku ovog suda br. KRI-26/95 od 20.10.1998. godine izvode iz MK umrlih od 1-15, zapisnik o izvršenom pretresu na terenu reona S. – K. – B. - D. općina S. M. s ciljem pronalaska materijalnih dokaza, fotodokumentaciju pretrage terena sa crtežom lica mjesta br. 22/10 od 13.10.2010. godine, vještačenje balističara po vještaku Ismetu Bećirspahiću od 26.05.2010. godine, balističko vještačenje pronađenih tragova i zrna na licu mjesta prilikom pretrage terena od 04.07.2010. godine, zapisnici o prepoznavanju osoba od strane svjedoka sa odgovarajućom fotodokumentacijom, uvjerenje općine Oštra L. - administrativna služba u vezi učestvovanja optuženog u oružanim snagama R. Srpske, zapisnik o lišenju slobode Državne agencije za istragu i zaštitu SIP-a od 05.03.2010. godine, izvod iz kaznene evidencije za optuženog, odluku o proglašenju ratnog stanja, izvod iz Službenog lista BiH, te izvod iz CIPS-a za optuženog.

Na održanom ročištu za razmatranje zaključenog sporazuma o priznanju krivnje, vijeće ovog suda je detaljno ispitalo optuženog Arsenić Petra na okolnosti njegove svijesti i volje za priznanje krivnje, činjeničnih radnji i kaznenog djela koje mu je optužnicom stavljeno na teret, njegove svijesti i volje za zaključivanje sporazuma, sa posebnim osvrtom i pažnjom na okolnosti da li je odista, optuženi, dobrovoljno, svjesno i sa razumijevanjem, bez prisile, prijetnje, obmane ili zablude priznao krivnju za činjenične radnje iz optužnice i za kazneno djelo za koje je optužen, te da li je isti bio svjestan svih pravnih aspekata i posljedica, koje proizilaze iz zakonskih odredaba u situaciji kada on, kao optuženi, prizna krivnju za počinjeno kazneno djelo, a osobito sa aspekta činjenice da se tom prilikom odriče prava na suđenje, prava na izvođenje bilo kakvih dokaza u pogledu činjeničnog utvrđenja, te da se odriče prava žalbe na izrečenu kazneno pravnu sankciju, koja će mu biti izrečena, a koja je već konkretizirana u samom sporazumu o priznanju krivnje.

S obzirom da je u toku održavanja ročišta za razmatranje zaključenog sporazuma o priznanju krivnje, vijeće ovog suda na nedvojben način, jasno i precizno, dobilo potvrdne odgovore na sva postavljena pitanja u pogledu dobrovoljnosti, svijesti, volje i razumijevanja za zaključivanje sporazuma, to je vijeće utvrdilo da je optuženi potpuno svjesno, sa razumijevanjem, bez ičije prisile, prijetnje, prevare ili obmane, dobrovoljno izrazio svoj stav kojim je priznao krivnju povodom podignute optužnice, i kaznenog djela za koje je optužen, te da je pod istim takvim okolnostima zaključio sporazum o priznanju

krivnje sa Kantonalnim tužiteljem, s kojim se i suglasio o vrsti i visini kazne za počinjeno kazneno djelo, pa je vijeće ovog suda, na temelju odredaba iz čl. 246. st. 4. i 5. ZKP-a F BiH, prihvatilo zaključeni sporazum.

Također je uvidom u materijalne dokaze utvrđeno da postoji dovoljno dokaza o krivnji optuženog, a koju krivnju je i sam priznao.

Nakon prihvatanja zaključenog sporazuma istog dana je i zakazano ročište za izricanje kazneno pravne sankcije za optuženog, pa budući da je vijeće prihvatilo zaključeni sporazum, to je isto optuženog i proglasilo krivim zbog počinjenog kaznenog djela-ratni zločin protiv civilnog stanovništva iz čl. 142. st. 1. u vezi sa čl. 22. preuzetog KZ SFRJ, te mu izreklo kaznu zatvora u trajanju od 10 (deset) godina.

Zaključenim sporazumom su se optuženi i Kantonalni tužitelj dogovorili da se optuženom izrekne kazna zatvora u rasponu od 10 (deset) do 12 (dvanaest) godina, pa je vijeće ovog suda, prilikom razmatranja i prihvatanja zaključenog sporazuma odlučilo istom izreci kaznu zatvora u trajanju od 10 (deset) godina, imajući u vidu olakšavajuće okolnosti na njegovoj strani, a to je priznanje krivnje, njegovo iskreno kajanje za počinjeno kazneno djelo, neosuđivanost, spremnost da iskreno svjedoči o događaju u odnosu na druge optužene, pa smatra da dogovorena kazneno pravna sankcija nije niti prenisko ni previsoko odmjerena u odnosu na činjenične radnje, težinu i vrstu kaznenog djela i posljedice istog, kao i činjenicu da su i oštećeni zadovoljni odmjerenom mu kaznom zatvora.

Optuženom se na temelju odredaba iz čl. 57. st. 1. KZ F BiH, u izrečenu kaznu zatvora uračunava i vrijeme provedeno u pritvoru počev od 05.05.2010. godine od 08,00 sati do 22.11.2010. godine u 11,40 sati.

Oštećeni se na temelju čl. 212. st. 3. ZKP-a F BiH, kao srodnici žrtava, sa svojim imovinsko-pravnim zahtjevima upućuju na parnicu, dok se optuženi na temelju čl. 202. st. 4. ZKP-a F BiH, oslobađa plaćanja troškova kaznenog postupka i paušala, te isti padaju na teret budžetskih sredstava suda.

Na temelju odredaba iz čl. 152. noveliranog ZKP F BiH („Sl. novine F BiH“ br. 12/20), optuženom se produžava pritvor od 22.11.2010. godine pa nadalje, te isti može trajati najduže 9 (devet) mjeseci, po rješenju, izuzetno iz važnih razloga u složenim predmetima, koji se može odlukom vijeća, produžiti još najduže 6 (šest) mjeseci.

Zapisničar
Fadila Šušnjar

Predsjednik vijeća
Nizana Sarač

POUKA O PRAVNOM LIJEKU:

Protiv ove presude, temeljem odredaba iz čl. 246. st. 4.tač. c.) ZKP F BiH nije dozvoljena žalba u pogledu izrečene kazneno –pravne sankcije.